

Ministerio Publico a permiti Glenbert Croes bay cas

AYERA mainta Ministerio Publico a sorprende tur hende na momento cu a dicidi di laga ex-minister Glenbert Croes bandona hospital y laga e sospechoso aki bay su cas. Tur e escenario cu Ministerio Publico a ‘laga pasa’ diamars mainta, caminda a uza mas cu 10 auto, casi 23 oficial di RST y Landsrecherche pa asina detene Minister Glenbert Croes den e caso cu a bira conoci como Portulaca.

Entre otro a dicidi di no hiba e minister pa warda di polis of pa oficina di Landsrecherche pero a crea un escenario dramático ora cu a informa cu a transporta Glenbert pa oficina di RST cu ta situa dentro di Marinierskazerne na Savaneta algo cu nunca antes a tuma luga.

Ministerio Publico mesora a emiti un comunicado di prensa informando riba detencion di Glenbert Croes, confirmando cu e ta un sospechoso den e caso menciona y na mes momento a impone e medida conoci como “beperking” loke ta nifica cu ningun hende cu excepcion di su abogado, ta ser permiti pa tin contacto cu su persona.

Wel diaranson mainta Glenbert a bira malo y a ser transporta pa dr Horacio Oduber Hospitaal aparentemente cu problemanan relaciona cu su curason y caminda contrario n’e medida di beperking, Glenbert a ricibi bishita di su señora loke a sali publica diahuebs anochi mes riba Facebook.

Diabierna mainta Ministerio Publico a dicidi cu ya no necesario pa mantene e decision di “beperking” pa cu e sospechoso Glenbert y hasta a dicidi cu e tin mag di bay su cas cerca su famia, bou di cierto condicionnan. Un desaroyo cu a bolbe pone Ministerio Publico den un situacion hopi negativo ya cu si a detene yiu di Betico Croes bou di e condicionnan estricto cu esaki a tuma luga y ni dos dia despues tur e medidanan estricto aki a keda anula mustrando cu henter e proceso aki a tuma un rumbo diferente.

Diamars mainta el a ricibi e stempel di ta sospechoso principal den e caso di Portulaca y ya pa diahuebs anochi aparentemente, esaki no t’e caso mas, sin cu tin indicacion cu tanto Landsrecherche como RST a somete Glenbert na un interrogacion riguroso manera a haci cu hopi hende durante di ultimo añanan.

For di diaranson cu el a bira malo tabata imposibel p’e wordo



interoga pues ta apenas algun ora cu e tabata secuestro pa RST den Marinierskazerne, lo a haci algun pregunta na su persona pero dificilmente lo por a aclaria tur cos cu e ex-mandatario den un periodo asina cortico.

Gobernador ontslag Minister di labor

GOBERNADOR a tuma e decision pa retira señor G.F. Croes for di su funcion di minister. E decision pa retira Minister Croes a wordo tuma despues cu el a pidi esaki di acuerdo cu articulo 17, sub b, di e Ordenansa Nacional pa Integridad di Ministernan.

Reaccionando riba e carta cu Gobernador a manda dia 9 di october 2024 pa Presidente di Parlamento, den cua a pidi – segun Constitucion ta prescribi – opinion di Parlamento, Parlamento a bay di acuerdo cu e retiro di minister Croes.

Gobernador a dicidi tambe di encarga señor R.G. Tjon, Minister di Husticia y Asuntonan Social cu e maneho y responsabilidad di e Ministerio di Labor, Energia y Integracion.